

BONERIANO®

EDITOR:
Bonaire Communication Services N.V.

Djarsars 11 òktober 2022 | Preis:\$1.00

'FREE FOR ALL' KU PREKARIO



Formalisashon Asosashon Ekuatoriano



Ekuatorianonan bibá na Boneiru ta formalisando Asosashon Ekuatoriano. E grupo ta teniendo diferente aktividat pa asina realisá e formalisashon. Na Boneiru tin 107 ekuatoriano ta biba. Djadumingu 16 di òktober tin otro evento pa rekoudá fondo. Ta trata aki di un barbekiú estilo ekuatoriano. Riba e fotonan e grupo di ekuatoriano bibá na Boneiru, durante un enkuentro pa realisashon di e asosashon di ekuatoriano.

Korte Supremo
a disidí ku
Boneiru no ta
kai bou di
Hulanda

Página: 5

www.cityshopbonaire.com

[f](#) City Shop Bonaire

[wa](#) +599 700.6442

[t](#) +599 717.3666

City Shop
Smart shopping • Better living

xerox™

OBERSI
ELECTRONICS
BONAIRE



sirbiendo BONEIRU pa
25 aña

Nos ta yama tur nos
klientenan danki pa e
konfiansa depositá den
nos durante e
25 aña nan aki.

Auto Parts & Garage Kaya Bulgaira # 9



El a para na kuna di Markultura

Sylvester Vrolijk a fayeresé

K R A L E N D I J K /
ORANJESTAD – Sylvester (Siro) Vrolijk a fayeresé siman pasá na Aruba. Siro a para huntu ku diputado Daniel Leo na kuna di lantamentu di Markultura, un fundashon den kua gobièrnanan di Boneiru, Aruba i Kòrsou tabata partisipá. Gobièrnu di Antia tambe

tabata na un distansia metí ku e proyekto aki, ku lamentablemente a frakasá despues. Vrolijk tabata hefe di LVV na Aruba i den e kalidat aki konsehero di e diputado i despues minister enkargá ku agrikultura, krio di bestia i peska na Aruba.

Sylvester Mylles Vrolijk, mihó konosí komo Siro

òf Sylvio, a nase na Aruba dia 31 desèmber 1938 i a fayeresé djadumingu 25 di sèptèmber. Despues di termina su HBA-A na Sint Canisius College na Nijmegen Hulanda, Siro a sigui su estudio na Rijkshogeschool voor Tropisch Landbouw na Deventer.

Na Aruba Siro a ku-

minsá su karera na Servisio Veterinario for di 1 yanüari 1962 te ku 31 desèmber 1975 den funshon di manager proyekto reforestashon Aruba Mira Lamar. For di 1 di yanüari 1976 te ku 31 di desèmber 1998 Siro a fungi komo hefe di Dienst Landbouw, Veeteelt en Visserij na Santa Rosa.

Den añanan setenta Vrolijk a kuminsá frekuenta Boneiru den kuadro di inisio dje proyekto konosí komo 'Carco Project', ku

despues a mira Markultura, ku su edifisionan na Sorobon. Vrolijk den e tempu ei tabata konse-hero di diputado Daniel Leo.

Despues ku Aruba a sali for di Antia Hulandes Vrolijk a bira konsehero di Minister Don Mansur, ku a sigui representá Aruba den Markultura.

Despues di un trayektoria di 37 aña komo empleado públiko Siro a baha ku penshun dia 31 di desèmber 1999.

Riba e fotonan aki por mira Sylvester Vrolijk na aktividatnan di instalashonnan di Markultura na Sorobon. E ta e persona kompletamente na man robes i man drechi riba e respektivo fotonan.



Brandweerkorps Caribisch Nederland

Prevení kandela kousá pa kòrtsluiting

Kandela kousá pa kòrtsluiting por sosodé pa motibu di uso inkorekto di aparato eléktriko òf pa e manera insigur ku ta konektá e aparato. Afortunadamente por prevení e rísiko di kandela pa motibu di kòrtsluiting mas tantu posibel si tuma e medidanan adekuá.



Bo tabata sa ku;

- waya di koriente por kousa kòrtsluiting i kandela si e kapa di isolashon di e waya dañá?
- waya di koriente por dañá si nan ta pasa bou di tapeit òf porta?
- por ta peligroso pa laga aparato eléktriko pa largu tempu sendé innesesariamente?
- kòrtsluiting por sosodé si bo pone muchu hopi aparato riba e mesun grupo di koriente?
- bo por limitá e rísiko di kòrtsluiting si bo mantené aparato elektróniko limpi?

Wak pa mas informashon tokante di prevenshon di kòrtsluiting riba www.rijksdienstcn.com

SAN HUAN XXIII

11 di Oktober 2022

"Kristu a duna nos libertat, pa hasi nos liber di bèrdat."
(cf Gal 5,1)



Promé ku Kristu e pueblo kreyente tabata biba "bou di peso di lei di Moises" (cf Mateo 23,4) imponé pa lidernan religioso, miéntras ku e lidernan mes "no tabata praktiká e loke ku nan tabata prediká." (cf Mateo 23,3b) Pero e amor di Dios Tata pa su pueblo, a pone ku El a manda su Yu, pa liberá kreyentenan, ... pa liberá nos." (cf Huan 3,16)

"Tin hende lo bisa: 'Ami ta liber pa hasi tur kos' Sí, pero esei no kiermen ku tur kos ta bon pa hasi." (cf 1 Kor 6,12ab)

"Nos ta yamá pa ta liber. Pero no uza e libertat ei pa entregá nos mes na mal deseo." (cf Gal 5,13)
Balorá e libertat ku Hesus a meresé pa nos, pa medio di su Sakrifisio Supremo riba krus!

Danki Señor, pa a liberá nos ku bo sanger presioso.
(cf Efe 1,7)

1L Gal 5,1-6; Salmo 119,41-48; Ev Lukas 11,37-41

005999-522-4056  Un Snehil Pan  unsnehilpan

I LOOK TO YOU.....

Soera...

2 aña a pasa.... pero ketu bai ta manera bo tey.... den tur kos bo nòmber ta menshoná i ta sinti bo presensia.....

Kaminda ku bo ta nos sá ku bo ta bon kuida.

Serka Señor mi ta na pas manera un yu serka su mama.
Mi anshanan a kalma den mi, mi kurason a bira tur trankil.
Salmo 131.

INVITASHON

Esposo i yu ta invitá tur famia, amigu- i konosinan na un santu sakrifisio di misa na okashon di **2 aña** di fayeresimtu di

Soeramina

Martines-Pourier

awe djarsars 11 oktober pa 7.30 anochi na parokia Birgen di Coromoto na Antriol.

Aseptá esaki komo un invitashon



Unda Supervishon i mantenshon a keda?

'FREE FOR ALL' KU PREKARIO

KRALENDIJK- “Mi a komprondé ku e personanan ku a pone kòntainernan i baki mata riba tereno públiko no ta paga prekario”, diputado Hennyson Thielman ta kontestá riba pregunta di BONERIANO. Na vários sitio riba nos isla por nota ku ta pone opstákulo riba tereno públiko. Na momentu ku hasi uso di tereno públiko mester paga derecho di precario. Esaki ta konta pa tur espasio públiko. Aparentemente esaki no ta e kaso, precario a bira ‘free for all’.

No tin kontrol

A bira un kustumber pa pone baranka i otro opstákulonnan riba tereno públiko. Tin estableimentunan ku baki di mata, stul i mesa riba asera, na diferente sitio, prinsipalmente banda di Malekon. Si tira un bista dilanti di Stadion di Playa, regularmente ta mira kòntainernan situá. Pues por konkluí ku no ta kontrolá esaki.

Ta surgi e pregunta: Direktorado Supervishon i Mantenshon di Lei no ta kontrolá? Kiko ta e balor




agregá di tin un regla si no ta mantené ni kontrolá? Despues di hasi mas investigashon BONERIANO a komprondé ku den sierto bario tradishonal sí ta aserká e habitante na momentu ku e pone algu dilanti su porta di kurá, riba

tereno públiko. Ta ki sorto di maneho e departamento di Entidat Públiko Boneiru (EPB) aki ta hiba?

BONERIANO a tuma kontakto ku departamento di Asuntunan Hurídiko i General (JAZ) pa sa si ta paga e derecho di precario

aki.

“Mi ta bai investigá esaki interno. Mi ta spera di por bin ku un kontestadenter di 2 siman”, Maritza Valdink ta bisa. E ta hefe di e departamento. E fotonan ta ilustrá opstákulonnan riba tereno públiko.



Detenshon sospecho labamentu di plaka

KRALENDIJK

-- Djabièrnè 7 di òktober Koninklijke Marechaussee (KMar) a detené un hende hòmer di 52 aña riba sospecho di labamentu di plaka. E hòmer tabatin e intenshon di biaha pa Repùblika Dominikana, via Aeropuerto Flamingo. Durante kontròl di seguridat na aeropuerto, a resultá ku e hòmer tabatin vários ènvelòp skondí na su kurpa, ku na total kasi 20 mil dòler na plaka kèsh.

E trahadó di seguridat di aeropuerto ku a haña e plaka, a alertá Duana i KMar. Huntu nan a realisá un investigashon, kaminda



despues funshonarionan di KMar a detené e hòmer riba sospecho di labamentu di plaka. Reshèrshi di

KMar ta sigui ku e investigashon i a konfiská e plaka pa mas investigashon.

montante di 10 mil dòler òf mas, mester indiká esaki serka Duana.

Personanan ta obligá di por demostrá orígen di plaka kèsh. Si un persona importá òf eksportá un

Duana i KMar ta traha huntu riba kontròl di bienes i persona na entrada i salida di Hulanda Karibense

Nan no por hasi petishon delantá

Studiante tambe tin derecho pa haña tereno

KRALENDIJK -- No ta un sekreto ku tin un lista di espera largu di persona ku a pidi tereno èrfpagt. E tristu di e lista akí ta ku e personanan ku ta riba e lista tin mas ku 10 aña ta wardando pa haña un tereno pa asina por konstruí nan mes kas. Dor ku gobièrnu ta tardando asina tantu, preis di hür di kas ta subiendo barabamente ku ta kasi imposibel pa e estudiante ku a regresá Bonaire bèk paga.

Alsi Anthony ta haña ku e diputado enkargá ku dunamentu di tereno, tin mas ku 10 aña sintá riba e posishon akí. Kiko e diputado ta hasiendo anto pa nos hendenan, specialmente studiantenan ku ke regresá kas bèk ku ke yega na un

tereno pa por konstruí nan propio kas.

Problema serio

Studiantenan ku ta i ku ke regresá kas bèk tin un problema serio. Nan no por hasi petishon adelantá pa un tereno. Tin un maneho ku ta bisa ku e persona mester ta biba i inskribí na Boneiru pa por haña un tereno èrfpagt. Ta ki dia e maneho akí a kambia, Anthony ta puntra, pasobra nos sa ku den pasado sí e estudiante por a inskribí pa un tereno i haña esaki tambe.

Komo tal, segun Anthony, e s'i ta kere ku e studiantenan mester por inskribí nan mes pa haña un tereno, pa asina ora nan kaba nan estudio, nan por kuminsá pa

konstruí nan propio kas. Ta kiko por ta robes na esaki.

Tur diputado ta para na aeropuerto ora ku e hóbenan bai studia afó i bisa pa kaba studia i regresá Boneiru bèk. Awor ora ku nan bini bèk, kiko awor.

Nan tin ku warda mas ku 10 aña pa haña un tereno, mirando ku kosto di bida ta sigui subi lo bai sali nan hopi karu pa despues di 10 aña paga pa konstruí un kas i tambe paga nan debe di estudio. Tur hende sa ku pa kuminsá no ta fásil pa un estudiante di Boneiru haña un trabou ora ku e kaba ku su estudio. Lamentablemente tur otro hende, no Boneriano, tin privilegio di haña trabou, Anthony ta skirbi.

Korte Supremo ta konkluí

No ta komprondé islanan BES bou di Hulanda

KRALENDIJK -- E sentimento di habitan-
tenan di Karibe Hulandes
ku nan ta siudadano di se-
gundo rango, parse ta asi-
na realmente tambe den
sentido hurídiko, di akue-
rdo ku un publikashon di
Dossier Koninkrijkre-
laties. Korte Supremo a de-
terminá un sentensia ku
bou di e parti Europeo di
Hulanda, Boneiru, St. Eu-
statius i Saba, no ta konta.

E entidatnan públiko for
di perspektiva Europa
Hulandes, no ta igual ku
e paisnan outónomo, Kòr-
sou, Aruba i St. Maarten.

Korte Supremo ta basa
su mes riba e lei di in-
trodukshon BES. A base
di esaki Korte Supremo
a deskartá un apelashon
pa kasashon di un hende
muhé ku a nase na Bo-
neiru pa por partisipá na
penshun di behes.

FITTIPALDI FOTOGRAFO
BO REKUERDO MI RESPONSABILIDAT
fittipaldi@pietersz@hotmail.com
Facebook: Fittipaldi Pietersz
WhatsApp – C:(599) 7856412

Korte Supremo a disidí ku Boneiru no ta kai bou di Hulanda

KRALENDIJK – Miéntras polítikonan ta duna shou i ta bringa otro, Korte Supremo, e korte mas haltu di Hulanda, a disidí ku Boneiru no ta kai bou di Hulanda, pues tur lei i regla ku ta konta na Hulanda, no ta konta pa islanan BES. Esaki ta reakshon di Sion Janga riba un desi-

shon di Korte Supremo ku siudananon di Boneiru, St. Eustatius i Saba, no ta igual ku esnan na Europa Hulandes.

Janga ta skirbi: “Den e lastu simannan nos a mira polítikonan duna show riba media sosial, elekshon ta na kaminda, normal bo no sa mes ku nan ta eksistí,

nos ta bringa pasobra nos no tabata sa si fiesta di boto ta legal òf no, Gezaghebber tabata punto di diskushon pasobra aparentemente e ta envolví den proyektonan ilegal i riba esei kada dos minüt ku Gobièrnu hasi algu chikitu, nan ta selebrá i saka potrèt.”

Miéntras nos ta tene nos

okupá ku tur e payasadan akí, di akuerdo ku Janga, e korte di mas haltu na Hulanda a disidí ku Boneiru no ta kai bou di Hulanda, pues tur lei i regla ku ta konta na Hulanda, no ta konta pa nos. Pensa riba lei pa protehá nos kontra kambio di klima, finansiamentu

di estudio, salario mínimo, penshun, etc. Na Hulanda tur esakinan ta eksistí i ta na nivel, na Boneiru nan no ta konta pa nos òf nan tei, pero hopi mas abou kompará ku Hulanda.

Janga ta pidi pa paga tinu riba tipo di kambionan akí ku ta afektando nos tur.



Kiebro den apartamentu

KRALENDIJK -- Djaweps 6 di òktober a drenta keho di kiebro den un apartamentu situá na Kaya Akuario. Deskonosinan a drenta e kas entre mitar di ocho di anochi i mitar di tres di mardugá

Nan a bai ku entre otro un laptop HP, un tas di lomba Adidas, un kargadó Samsung i un pasport.

E kaso ta bou di investigashon.

Kiebro den kas

KRALENDIJK -- Djabièrnè 7 di òktober a drenta keho di kiebro den un kas situá na Kaya Oktaaf. Entre 9'or di anochi i kuartu pa un di mardugá, deskonosinan a drenta e

kas i a bai ku entre otro un laptop Dell ku su kargadó, un laptop Lenovo, un kompiuter di sambuyá Extreme, algun hoyá, airpods i sèn kèsh.

Ta investigando e kaso.

Detenshon pa violencia

KRALENDIJK -- Djabièrnè 7 di òktober alredero di 1'or di mardugá, Polis a detené dos hòmben riba Plasa Wilhelmina pa violencia públiko.

E hòmbenan, R.R.R.B. di 20 aña di edat i R.R.D. di 17 aña di edat, tabata enbolbí den un bringamentu pafó di un estableimentu nokturno.



Programanan di Bonaire.tv

TELBO kanal 70
Flamingo TV kanal 23

Djamars 11 òktober 2022

12.00 Herensia: Hubert Anthony
13.00 Aki Boneiru: Chelsey Domacassé
14.00 Herensia: Ramonsito Booi
15.00 BAPA: Susy Martines Bernabela

16.00 Aktualidat: Rekresaroyo 60+
17.00 Aki Boneiru: Uchi i Balentin 50 aña kasa
18.00 Herensia Korsou: Clark Jansen
19.00 BAPA: Sylvia Martis

20.00 Herensia: Eric Newton
21.00 Aki Boneiru: Echo
22.00 Herensia: Josefina Silie-Coffi (Yufrou Ui)
23.30 Puerto Latino: Luis Zárraga

Tur mèrdia 12'or ta kuminsá un programashon nobo di 4 ora.
E programashon aki ta ripití pa 24:00.

YUDAMI SEÑOR

“Sea asina bon, O SEÑOR, di librami; O SEÑOR, pura pa yudami.” Salmo 40:13(BS)

Tin momento kaminda ami i abo tin ku rekonosé ku ta Dios so por yuda nos. Nos tin mester di djE tur dia, tur ora mes. Laga nos humiliá nos mes Su dilanti awe, konfia den Su poder i spera ku pasenshi pa E aktua. Hopi ta e biahanan, pa no bisa tur biaha, ku nos ke hasi kosnan den nos mes forsa, i ta keda purba purba, te ku nos ta kansa, desgustá, desanimá i asta frakasá.

Tin situashonnan ku nos mester pasa aden, pasobra nos tin lèsnan pa siña for di nan i tambe krese dor di nan. Pa nos e situashon por tarda, pero pa Dios nò! Pasobra E sa ki ora nos a siña a lès.

P'esei rekonosé awe ku ta Dios so por yuda nos i saka nos for di e situashon atverso ku nos ta pasando aden. Rekonosé tambe ku Dios sa e momento korekto pa bolu e situashon. E situashon ku ta musta imposibel, lo konkretisá i bira posibel segun Dios Su plan pa bo bida, trabou, famia, salú, ministerio, etc.

Salmo 40:17 ta bisa nos: “Ma ami ta afligí i den nesesidat; sin embargo, Señor ta kòrda riba mi. Bo ta Esun ku ta yudami i ta librami; no tarda, O mi Dios.”

Sabi esaki; Dios ta kòrda riba bo. P'esei bisa Dios awe ku sinseridat di bo kurason: YUDAMI SEÑOR! I despues, kere tambe ku Señor lo yuda bo.

Miéntras bo ta sperando yudansa di Señor, sigui sklama i sigui kere! Diannenara Mercera

Produkshon PGM

Krus Kòrá ta yuda Walter Faneite

KRALENDIJK – Krus Kòrá Boneiru ta e promé instansia ofisial na Boneiru ku a sali dilanti pa yuda Walter Faneite, e boneriano ku a biba 8 aña bou di sirkunstansianan difisil na Sao Paulo, Brazil, despues ku a hòrta su pertinensianan, inkluso su pasport.

Djasabra último Walter a risibí invitashon via Bòl Antoin di BONERIANO pa bishitá e edifisio na Krus Kòrá na Antriol pa skohe paña di bisti. Na mes momentu el a risibí un pakete di komestibel i artikulonan di promé nesesidat.

Asha Wilsoe-Pourier, Rignald Marchena i Tyrina Martis a risibí Walter Faneite. Krus Kòrá tin un asina yamá Thriftshop bon surtí ku paña di bisti, sèrbètè i otro produktonan di uso. Walter por a shòp na su antoho djasabra.

Mientrastantu por informá ku un persona ku tambe a yuda Walter Faneite hopi for di kuminsamentu ta James Kroon komo persona. Entre otro el a sòru pa kubri gastunan di un lugá temporal na unda e por keda.

Bòl Antoin a siman aki

a bai ku Walter na Akseeso, e instansia di gobièrnu enkargá ku Asuntunan So-

sial pa mira kon por yud'é. Tambe Antoin ta gui'é pa instansianan manera Plen-

chi di Trabou i Asuntunan Sivil pa e por haña sédula.



Konstrukshon ilegal a yega Parlamento

KRALENDIJK – Miembronan di Tweede Kamer, van Raan, Wassenberg, ámbos di PvdD i Simons di BIJ1, a hasi pregunta por eskrito na ministernan di infrastruktura i maneho di awa i di hustisia i siguridat, pa reakshoná riba un publikashon di 'Follow the Money' tokante konstrukshon ilegal na kosta di Boneiru.

E parlamentarionan ta puntra kiko ta reakshon di e resultadonan di e investigashon ku gezaghebber di Boneiru, nombra pa Hulanda, ta fasilitá proyektonan di konstrukshon promé ku duna pèrmit i ku e proyektonan akí ta menasá koral.

Tambe nan ta puntra, kiko ta reakshon di e ministernan di invershonistanan hulandes ku ke konstruí kosta yen ku proyekto ilegal i kon ta bai aktua kontra e invershonistanan akí. Tambe kon e mandatarionan ta mira kontra e señalnan di e seshon ku ta otorgá

pèrmit, mester supervisá òf mester aktua a base di lei i regulashon na Boneiru i hopi biá no ta sigui e liheresa i kondishon di hopi invershonista hulandes i desaroyadónan di proyekto i sí gobièrnu di Reino ta bai fasilitá Boneiru den esaki.

E parlamentarionan ta sigui puntra, sí ta kuadra ku no ta eksistí lei òf regulashon, òf regla pa importashon di santu artificial. Sí no ta asina, kiko ta bai hasi pa protehá e koral eksistente.

“Kiko boso ta bai hasi pa sòru pa e koral no bai mas atras pa medio di e proyektonan akí. Boso por duna kon ta bai atendé ku e moshon di miembronan van Raan, Wuite i Simons, tokante e ròl neutral di gezaghebber pa otorgamentu di pèrmit i kambio di plan di destinashon. Sí ainda no a hasi trabou na e moshon, kon ta planiá pa duna eheshon na e moshon,” e parlamentarionan ta puntra.

BONEIRU MESTER DI BO!


Fundashon Históriko Kultural Boneriano



ta buskando boluntario pa yuda salbuardiá nos patrimonio kultural-históriko tangibel i intangibel.

Trabou ku tin pa hasi:

- Selektá i archivá dokumento
- Digitalisá foto, oudio i imágen
- Ordená i registrá artefakto
- Identifiká persona, suseso, sitio etc. riba foto
- Hasi entrevista pa Herensia i programanan kultural
- I hopi mas trabou.....



Tin trabou ku por hasi na kas tambe. Tuma kontakto ku FuHiKuBo na e-mail fuhikubo@gmail.com òf app (por yama tambe) na telefòn 795-0020.

Konseho Insular mester kontrolá

KRALENDIJK -- Konseho Insular mester kontrolá i debatí a base di konosementu i no papia hasi drùk, konta storia, akusá, demostrá sabiduria, hunga interesante sita lei atministrativo i bira populista. Esaki Arhutr Sealy ta trese dilanti.

Sealy ta skirbi, reunion di Konseho Insular pa 11 di òktober tin komo punto 9 riba agènda, integridat atministrativo i kultura di miedu den Entidat Públiko

Bonaire.

Sealy: “Pa e tóipiko aki mi ta puntra, ta e rapòrt di Follow the Money (FTM), so ta e tóipiko, tin mas rapòrt, ki e preguntanan di investigashon ta, ki konklushon i rekomendashon tin, kon konfiabel nan ta i kon por kontrolá e fuentenan.”

Den e rapòrt di FTM tin entre otro pará e siguiente: ‘Rijna ta un empresario i ta pensa manera un empresario’. Esei ta den su DNA. Na papiamentu ta bisa esei

ta den su sanger. Ta un manera sugestivo pa duna forsa na e ponensia. Ta un ponensia falsu pa motibu ku ta kombiná e tóipiko integridat pa saka konklushon ku Gezaghebber Rijna no ta íntegro.

Ku otro palabra, akusá e persona i no trata kiko ta integridat i di kon e ta importante den maneho di Boneiru i kon promové integridat i eliminá kultura di miedu, segun Sealy.

Por último. Di akue-

rdo ku Sealy, tur miembro a lesa tur rapòrt ku tin. Si no ta e kaso, sea honesto i komo digno representante di pueblo, baha punto 9 for di agènda. Konseho Insular mester kontrolá i debatí a base di konosementu i no papia hasi drùk, konta storia, akusá, demostrá sabiduria, hunga interesante sita lei atministrativo i bira populista. Hasi e pregunta ku sí tur konsehal, diputado, ámtenar i konsehero, ta tene nan na e kódigo di in-

tegridat.

Sealy: “Mi konseho konsehalnan no bai pasa bèrgwensa ku un tóipiko asina difisil i kere sin mas kontenido di e rapòrt, aunke kon bon reputashon FTM tin na Hulanda.

Si ke trata punto 9 tòg, ta bon pa durante reunion kada frakshon duna di konosé ken ta hiba palabra, pa evitá ku mester puntra ku sí e tantu minüt pa tóipiko ta pa frakshon, òf pa miembro.”

‘Summerschool’ a entregá sertifikado

KRALENDIJK – Djabièrnè 40 partisipante di ‘Summerschool’ a risibí nan sertifikado. Durante un enkuentro festivo na Hillside, e partisipantenan a risibí nan prueba di partisipashon na ‘Summerschool’

for di man di dosente Jane.

E alumnonan di grupo 7 i 8 di skol básiko un siman largu a traha duru na mehorashon di idioma Hulandes. Nan a praktiká hopi ku lesa i papia Hulandes. Esaki pa hopi mucha ta un

problema grandi. Momentu ku nan yega SGB ta importante pa por sigui i partisipá na tur lès ku ta na Hulandes.

E nivel di e alumnonan dor di entre otro lèsnan ku a kai afó durante e periodo di Covid, ainda ta insuficiente.

Durante ‘Summerschool’ henter siman den oranan di mainta, a traha duru riba idioma.

Den oranan di mèrdia nan a partisipá na eventonan deportivo i a hasi ekskurshon.

E alumnonan tabatin un siman edukativo i bunita durante e fakansi di Regata. Stichting Lezen en Schrijven Bonaire ta spera di por organisá atrobe un ‘summerschool’ durante fakansi di pasku di resurekshon.



Dia Mundial di Salú Mental

‘Hasi salú mental i bienestar prioridat’

KRALENDIJK – Djaluna 10 di òktober rònt mundu a konmemorá Dia Mundial di Salú Mental. E tema di e aña aki ta ‘Hasi salú mental i bienestar un prioridat pa tur hende rònt mundu’.

Djaluna tambe ta 12 aña pasá ku Boneiru, Saba i St. Eustatius, a bira entidatnan spesial di Hulanda. Pa por hasi salú mental di tur hende un prioridat, mester wak tambe e situashon sosial ekonómiko di e islanan.

Pero promé ku sigui, kiko ta salú mental i bienestar realmente. E organisashon mundial di salú mental, WHO, ta usa e definishon ku salú mental i bienestar ta un situashon di bienestar den kual e individuo ta realisá su propio kapasidatnan, por manehá e tenshonnan normal di bida, por traha na un manera produktivo i fruktifero i ta kapas pa duna un kontribushon na su komunidad’.

E sirkunstansianan den

kual un hende ta biba, hopi bia ta konektá ku e situashon finansiero. Por ehèmpel, un hende ku ta biba den pobresa por lo general ta biba bou di kondishonnan ménos faborabel i esei tambe ta influensia su salú fisiko i mental.

Espektativa

Na momentu ku a uni ku Hulanda, tabata reina e espektativa ku e kondishonnan sosial ekonómiko riba e islanan lo mehorá, pero lamentablemente ainda tin hopi pobresa. Investigashonnan sientífiko a demostrá vários bia ku pobresa i problemanan síkiko, ta influensia otro.

E strès diario pa por sobrebibí, òf pa proveé den nesesidatnan básiko i e problemanan pa drumi ku por ta konektá for di esei, ta pone ku hende ku ta biba den pobresa ta kore un riesgo mas grandi di haña problemanan síkiko, manera depreshon, trastornonan di angustia i adikshon.

Ademas, hendenan ku ta biba den pobresa ta ménos kapas pa tuma desishonnan riba término largu dor di stress króniko. Hopi bia ta asina ku e estilo di bida ta insaludabel, manera humamentu, kuminda insaludabel i tiki moveshon. Konsekuentemente esaki atrobe ta sòru pa problemanan fisiko, manera diabétis.

Influensia

Pobresa pues tin un efekto riba nos manera di sinti, pensa i hasi.

E efektonan no ta solamente negativo riba nan mes, por ehèmpel ku hende den pobresa ta ménos felis, pero por mantené e situashon di pobresa tambe. Personanan ku malesanan króniko, tantu mental komo fisiko, tin mas chèns pa haña problemanan finansiero dor di inkapasidat laboral i pèrdida di trabou.

Tambe pobresa ta oumentá e riesgo di problemanan relashoná ku e manera ku mayornan ta



eduká nan yunan òf frakaso na skol. Tur e faktornan aki tin influensia riba e desaroyo di muchanan den famianan pover i konsekuente-mente ta eksistí e riesgo ku ta pasa e problemanan over na e siguiente generashon. Bèrgwensa rònt di pobresa por pone ku sosten sosial di famia, òf amigunan ta kai afó i ku no ta buska yudansa apropiá pa problemanan finansiero.

Kada bes ta tuma mas i mas iniciativa pa kombati pobresa i asina tambe mehorá e bienestar di e komunidad. E desaroyo akí tambe ta di aploudí den kuadro di

Dia Mundial di Salú Mental, pero ainda tin un kaminda largu pa kana.

Un manera lògiko pa trata ku pobresa ta, sòru pa e hendenan tin mas sèn, dor di entre otro mehorá servisionan sosial.

Banda di esaki, Mental Health Caribbean (MHC) ta hunga un ròl importante den fortalecé e resiliensia síkiko di e komunidad. MHC lo sigui komprometé su mes pa huntu ku soshonnan di kadena, kibra e sirkulo visioso akí i sigui mehorá e kalidat di bida pa e habitantenan di Hulanda Karibense.

Merkado Europeo a presta mas mihó

Oumento kantidat di turista na sèptèmber

KRALENDIJK -- Tourism Corporation Bonaire (TCB) ta raportá un total di 10.695 turista di estadia pa luna di sèptèmber, loko ta enserá un oumento di mas òf ménos

7% di e yegada pre-pandémiko, segun sifranan di Ofisina Sentral di Statistik, CBS, di 10.000 turista di estadia na luna di sèptèmber 2019.

E merkado oropeo a

presta mas mihó ku tur otro kantidat registrá di bishitante. Boneiru a registrá un prestashon positivo di su tòp dos merkadonan mas importante.

Boneiru a yama bon

biní na en total 5266, 49%, di bishitante Hulandes i en total 2190, 20%, bishitante for di Estádus Unídos.

Boneiru a mira tambe un punto kulminante den e kantidat di yegada for di e isla bisifia Kòrsou, un total di 1708, loko ta 16% di e kantidat total di yegada.

E punto kulminante akí ta un konsekuensia direkto di diferente evento ku a tuma lugá riba nos isla, manera Dia di Boneiru, Bonaire Bikers Week i Bonaire Music Festival.

Diariamente TCB ta monitoriá Boneiru su prestashon turístiko i ta kompará, meskos ku otronan den region, su indikadónan krítiko di

prestashon ku e sifranan pre-pandémiko.

Aña 2019 tabata un di e añanan ku mihó prestashon pa Boneiru i aktualmente TCB ta us’é komo punto di referensia pa midi Boneiru su reku-perashon turístiko.

Mas aleu Boneiru a midi un durashon promedio di estadia pa merkado Hulandes di 14 anochi i 7 anochi pa merkado merikano.

Banda di esei, e grupo di edat dominante di tur bishitante ta varia entre 46 i 65 aña. Na luna di ougùstùs Boneiru a yama bon biní na dos barku kru-sero, ku en total 7695 pasahero.



Potrèt di Chinouk Luksch, kende a partisipá na ‘Bonaire Photo Contest’.

SOLUSHONNAN ESTATAL NOBO

Tempu ku e Akuerdo Estatal Nobo ku Hulanda a drenta na vigor na 2010, no ta asina ku nos tur a sinti ku e transishon di '10-10-10' lo no a dura hopi? Miéntras ku Antia Hulandes tabata 'evaporando', manera ofisialnan di Nashonnan Uní tabata yama e proseso di desmantelashon, algun hende ya tabatin plan nobo. Pero e tempu no tabata hechu ainda. Nos ta kere ku awor e tempu a yega pa habri e diskushon atrobe.

Akibou un imágen di e 'Eskudo' ofisial di Antia Hulandes di ántes, ku a keda konstituí na aña 1954 i ku tabata konsistí di e

siguiente seis isla: Aruba, Kòrsou, Boneiru, San Martin, Saba ku Statia.

A usa e eskudo aki for di 23 di òktober 1964. E tin seis strea, un pa kada isla di e original 'Antia di 6', ku a ser lantá komo un entidat estatal na aña 1954.

E eskudo tin dos sèt di tres strea. No ta konosí si e diseñadó a premirá futuro. Pero despues di hopi buelta, nos por yega na e konklushon ku futuro di e 6 islanan aki ta pa nan forma 2 grupo di 3 isla.

Islanan abou: Aruba, Kòrsou y Boneiru;

Islanan ariba: San Martin, Saba ku Statia.

Motibunanan prinsipal pa esaki ta: 1) Idioma (Islariba Ingles; Islanan abou Papiamentu) 2) Distansia geográfiko (910 km) i 3) Afinidat (kulturalmente y naturalmente e dos sèt di islanan aki ta pertenesé na otro).

Ta p'esei, den e serie di artíkulo aki nos ta sugirí solushonnan estatal nobo pa Aruba, Kòrsou y Boneiru. Sin embargo, hopi di nos sugerensia por ta útil pa Islariba tambe.

Promé Ministro anterior di Antia Hulandes, Juancho Evertsz, tabata fuertemente kontra di Aruba su plannan pa sali for di Antia. El a premirá e problema fatal klaramente ora el a bisa: 6 ménos 1 = 0. Y asina el a sosodé. Aruba a sali na 1986 y na 2010 e sobrá 'Antia di 5' a keda desmantelá. An-

tianan Hulandes no ta eksistí mas.

I lo no wòrdu rebibá tampoko.

Sinembargo, dos entidat nobo por nase. Nos ta spera ku nos tambe ta premirá futuro korektamente ora nos ta bisa: $6 - 1 = 0$, pero lo bira 2×3 .

Por lo pronto nos no ta rekomendá independensia estatal kompleto pa nos islanan. Pa e siguiente motibunanan.

Nos ta biba den e Era di Transformashon. Kambionan mundial grandi ta na kaminda. Riba tereno polítiko, ekonómiko, ekológiko, kultural i sobre todo spiritual. Pa nos propio sobrevivensia komo ser humano, nos lo mester evolushoná pa yega na un of otro forma di gobernashon mundial ku ta demokrátiko i alabes ekológikamente responsabel, basá riba un of otro forma di iluminashon spiritual.

E transformashon aki lo bini ku hopi doló i lo eksigí sakrifisio ekstremo. E lo tuma hopi tempu. Si e ta sali eksitoso, kisas pa fin di e siglo aki nos lo por spera yegada di un Era Nobo di sano huisio i pas.

Mientrastantu, probablemente nos lo ta mas seif bou di e alanan di Reino Hulandes, te dia ku nos komo dos estado federal ta kla pa drenta den Region Karibense na un manera sigur i natural. Nos no tin un privilegio pa profetisá. Pero nos ta risk'é.





*Eskudo original di Antia.
E Korona ta di Kasa Real di Hulanda.
Lema: Libertate Unanimus.
Libertat ta uni nos.*

MONCHI & TONCHI

Tonchi, hendenan ta pone kos riba alsera sin paga prekario.

Awèl si, ami te traha un pida hòki riba Malekon, pa mi pasa dia huntu ku mi 6 yunan.



KOLOFÓN

Editor Bonaire
Communication
Services N.V.
Kaya Irlanda 12,
Tel. 717-8482

E-mail:
extrabon@gmail.com
Wèpsait:
www.extraboneiru.com

Direktor
Shirley Martis
785-3824
796-3824

Hefe di redakshon
Bòl Antoin
786-6818

Redakshon
Armand 'Papi' Antoin
Davienuska Janga
Velli Gijsbertha
Nathaly Evertsz
Edson Pietersz

Ibi Piar (deporte)

Partner na Aruba
Awe Mainta

Partner na Kòrsou
Extra

Layout
Davienuska Janga
Gairo Frans

Aviso
avisobon@gmail.com

DI BINTIOCHO DJADUMINGU SIKLO C

Promé Lektura : 2 Reinan 5, 14-17
Salmo : Salmo 98, 1. 2-3. 3-4
Di dos Lektura : 2Timoteo 2, 8-13
Evangelio : Lukas 17, 11-19

Hesus ta bira tristu ora E ta mira ku su paisanonan ta ménos agradesido ku esnan ku ta pertenesé na otro pais. Echo ta ku mas frekuentemente nos ta dirigí nos mes na Dios pa pidié fabornan ku pa gradisí pa e benefisionan ku E ta konsedé nos. Atrobe tabata e hudiunan ku a musta di ta malagradesido i e paganonan tabata musta mihó boluntat. E leproso akí a musta e gestonan di Naaman ora el a keda kurá: gradisí Dios públikamente.

Hudiunan no tabata mòrs ku samaritanonan i den e grupo ei tabatin nuebe hudiun i un samaritano. Un desgrasia komun a kibra tur barera nashonal i rasial. Den e tragedia komun di nan lepra, nan a lubidá ku nan tabata hudiun i samaritano i nan tabata kòrda ku nan tabata hendenan ku tabatin un gran nesesidat di yudansa i kompreshon. A sosodé ku nan manera bestianan feros di mondi ku ora un peliger grandi ta ataká nan, por ej. Un inundashon, etc., nan tabata reuní den grupo sin ataká otro, asta esunnan ku ta mas enemigu bou di nan. Sigur un di e kosnan ku mester uni sernan humano lo ta e enorme nesesidat ku nos mester di yudansa di Dios.

Nan a para na un distansia. A ordená e leproso pa e grita: "Ami ta malu", i ku e mester a para na mitar kuadro di distansia di esnan sano.

Únikamente unu a bini bèk. Ningun otro historia di evangelio ta señalá tan direktamente e ingratitut di sernan humano pa Dios. Hopi di nos ta supliká pidiendo fabornan i unabes ku haña esakinan, nos ta lubidá di yama danki. Dios a duna nos su propio Yu. Kuantu be nos ta yama danki pa e inmenso fabor akí? E ta duna nos alimento. Kuantu persona ta gradisí Dios ora nan ta kome? I pa e próhimo? Esta lihé nos ta lubidá e fabornan risibí!

KONKLUSHONAN

Mi ta kòrda e esena di e diesnan gritando. E kuenta ta

yen di sirkunstansianan bibu i ta revelá un testigu mashá bon informá. Hesus ta drentando un pueblo. E leprosonan mester a presentá nan mes promé ku E ta yega na e promé kasnan pasobra despues di ei nan no por pasa. Lei tabata prohibí nan pa drenta e pueblonan i e siudatnan i ku nan mester a biba alehá di tur esnan sano. Hesus ta skucha e batimentu riba bleki. Esei ta e señal di alarma ku nan ta duna, p'asina esnan sano alehá nan mes. Promé ku nan kana bai pa evitá kontaminashon, esnan mas generoso tabata laga algun pida pan òf moneda riba e piedranan. Hesus no ta hui di nan. E no tin asko di nan. E ta warda te ora nan aserk'É. Pasobra e no tabatin asko òf repudio pa ningun enfermo di alma òf di kurpa, sino kompashon i deseo pa san'è.

Esaki mester ta e gritu ku di nos alma ta subi kada dia pa e amabel Kurason di Kristu. **Hesus, Maestro, tene kompashon di nos,** nos ku ta sufri di e lepra di piká. Tene kompashon ku esnan impuru i esnan kolérik, ku e ladronnan i e asesinonan, ku esnan floho i mentiroso. Señor: nos ta un inmenso kolekshon di leproso di alma ku ta supliká bo kurashon. Mi ke pidi bo pordoná esnan ku no ta pidi bo pordon.


Pa kuantu leproso di alma mi ta resa? Pa e pekadornan di mi famia, pa esnan di mi bario, pa esnan ku ta bai muri awe, pa esnan ku ta den mayor peliger di kondena pa kousa di e duresa di nan kurason? Lo mi kòrda e frase di Pio XII: "Misterio tremendo i digno pa meditá: ku salbashon di hopi pekadornan ta danki na gran parti di e orashonnan di e amigunan di Hesus ku ta implorá su miseri kòrdia".

Bai laga e saserdotenan

mira boso

Hesus ke un kurashon diskreto i ketu. E ta manda nan na e respektivo saserdotenan di e pueblonan, p'asina ku segun e lei den e buki di Levitiko (Kapítulo 13) ta ordená, pa asina nan risibí e sertifikado ku ya nan sí ta realmente kurá.

Bai laga e saserdotenan mira boso: Señor ku e mandato akí ta sigui sona den e oido manera e refrannan ku nos a siña komo mucha i ku nos no ta lubidá. Laga nos bai serka e



saserdote pa pidié konseho (nan), pa skuch'è prediká, pa konfesá nos pikánan serka dje i risibí e apsolutashon ku ta kita e enfermedat di lepra spiritual di nos alma. Maske e saserdote ta pekadornan, laga nos kòrda sinem-bargo ku Pedro, despues di a nenga Bo tres be, a logra kombertí ku su próksimo predikashi tres mil pekadornan. Pasobra esun ku ta skucha e saserdote ku ta evangelisá, ta skucha Abo oh Kristu.

Na unda e nuebe sobránan a keda?

Un sombra di tristesa ta pasa riba e kara semper asina alegre di Hesus. I awe den kada un di e 24 oranan di dia,

E ta sigui puntra: "I na unda e nuebe sobránan a keda?" Di kada dies katóliko, dikon nuebe no ta bai misa? Di kada dies persona ku ta gana hopi plaka, dikon nuebe no ta duna 10 porshento na esnan pover? Di kada dies ku ta kome, dikon nuebe no ta gradisí Dios ora nan ta kome? Di kada dies ku ta baha di un bús despues di un biahe sin kontratempu, dikon nuebe no ta gradisí e bondat Dios? Dies ta bai drumi despues di un dia trankil, i nuebe ta bai drumi sin yama Señor danki.

konsedé na kada unu.

Tambe awor i aki, **un nobenta porshento di nos ku ta risibí fabornan di Dios, ta malagradesido.** I Hesus ta keha e ingratitut akí. Ku otro nan nos ta trata di ta bon eduká i ku nos Dios nos ta mal eduká. Ingratitut ta sera pa nos e porta pa risibí hopi fabor ku lo konsedé na nos si nos lo tabata agradesido. E buki di Deuteronomio ta bisa ku lubidá fabornan di Dios ta ingratitut, i e Buki di Eklesiástiko ta aña di ku esnan ku ta ingrato ku Kreador ta nenga nan hopi fabor di she-lu (Ecl. 20).

Un di nan a bira bèk al-abando Dios na bos altu

Gratitut ta bini di apresia i balorá loke Dios ta duna i regalá nos. Dios meresé ku debesenkuando nos ta suspendé nos trabounan, nos divershonnan i asta un poko nos biahenan, pa dediká un ratu pa yam'É danki.

Den Santa Skritura gratitut ta haña un atenshon sorprendentemente importante. E ta e kontesta riba e fabornan i grasianan di Dios. E alma asombrá pa e generosidat di Nos Señor, ku goso ta rekonosé e bondat divino. E ta un sensashon di goso i di venerashon pa e magnífico generosidat di e bon Dios.

Mamanan ta puntra nan yunan ora nan ta risibí un regalo: "Kiko bo ta bisa?". Mama Iglesia ta puntra nos meskos: "Kiko bo ta bisa?". Dios a duna bo demasiado regalo p'asina bo no ta kontestá ku frekvente akshonnan di grasia. Kon ami ta reakshoná riba e grasianan ku Dios a dunami? Mi ta agradesido? Señor: ku sí lo mi ta, hopi i semper!

Pablo VI a bisa ku e bon kristian ta un ser ku semper ta gradisí Dios. I San Francisco de Sales a rekomendá ku kada persona mester pensa no ún-kamente riba e donnan ku Dios a duna nos tur, sino tambe riba e regalonan mashá personal ku kada ken a risibí di e generosidat divino. I ku asta nos mester gradisí Dios pa esunnan "malu" ku brelnan terenal ta parse dañoso pa nos, pero ku e brelnan selestial nos lo mira ku nan tabata mashá probechoso pa nos salbashon eterno.

Mecaelan Sint Jago-Pourier a risibí

Mecaelan Sint Jago-Pourier a risibí promé Santa Komunion na Misa San Luis Beltran na Rincon. Esaki a sosodé djasabra 8 di òktober. E siguiente mainta el a tuma Sakramentu di Konfirmashon. Misa tabata animá pa Kor San Francisco de Asis djasabra anochi. Durante e anochi Pader Ivan Dario Perez Gomez a resa i bendishoná un siudadano di e barío, konosí pa Bòle. Un bunita misa pa tur ku tabata presente, bispu di fiesta di patrono San Luis Beltran.



Formashon di ekipo profeshonal



Djabièrnè 7 di òktober Eagle Eye Media, huntu ku Intensity & Opulent Relaxation komo huésped spesial, a tene un formashon di ekipo pa un grupo di profeshonal na Captain Don's Habitat. Ku e tema, salú, dil ku strès, konfiansa i komunikashon, e evaluashon kompleto tabata 100 porshento di un formashon di ekipo profeshonal.



Klousura Festival di Regatta 2022

KRALENDIJK--Djasabra wikènt pasá, tabata e último anochi festival di Regatta 2022. Hopi hende riba pia den sentro di siudat, pa presensia e bandanan ku a presentá e anochi riba esenario. Kada un a duna tur ku tin i fanátikonan a duna reakshon pa kada un. ICONS, agrupashon musi-

kal di Kòrsou a sera e anochi djasabra. Djis algun minüt ku e banda a stòp di toka, áwaseru a kuminsá kai. Notabel i hendenan a komentá, praktikamente tur e banda òf presentadónan di Aruba òf Kòrsou, durante nan presentashon riba esenario, awa no a kai.

Nan a kombiná artista i

músiko Boneriano den nan programa. Ta algu nobo, mirando ku den pasado esei no sa sosodé. Sigur hopi interesante i un bunita show, loke a komentá. Ántes esnan di otro isla tabata bin Boneiru i hasi nan show. Awor ta implementá den nan shon e kultura di Boneiru. Tremendo!



Grupo ESO meresé un sunchi

KRALENDIJK -- Agrupashon musikal ESO ‘merece un beso’, di bèrdat e meresé un sunchi. E grupo tin hopi aña di eksistensia. Djabièrnè 7 di òktober e grupo aki a sera siman di Regata atardi lat i despues di un ratu nan a toka riba esenario na Festival di Regata.

ESO miéntras nan tabatin un pouze, a konta tur presente poko di e grupo. “Hopi aña ESO a toka na

Kas di Regata. Ei ta nos kuna. Nos kas kaminda tur kos a kuminsá, un simpel tokamentu i sigui kana bira Grupo ESO. Awor nos tin 29 aña di eksistensia, na kaminda pa 30.”

Durante e atardi e grupo a animá bon i hendenan a balia i gosa di músika bibu di grupo ESO. E bailadó konosí komo Sisi, ta esun ku ta entretené e públiko na su manera úniko, na banda di e bon músika di e grupo.





Rijksdienst Caribisch Nederland



DESTAHO

INFRASTRUKTURA DI IDENTIDAT 2022

Rijksdienst voor Identiteitsgegevens (RvIG, Servisio di Reino Sentral pa Datonan di identidat), ku ta forma parti di e Ministerio di Asuntunan Interno i Relashon den Reino (BZK), ta manehá e sistemanan di dato di identidat. Nos ta regla e forma ku ta registrá, manehá i suministrá dato di identidat di siudadano pa servisio públiko. Esei ta hasi nos e servisio prinsipal den e infrastruktura di identidat na Hulanda i e parti hulandes di Karibe.

RvIG tin intenshon di start un destaho pa e proseso rondó di emishon di e tarheta di identidat na Boneiru, Sint Eustatius i Saba (BES). Pa RvIG ta importante pa prepará e emishon ei bon, i parti di esei ta sondea e merkado pa medio di un konsulta di merkado.

Na 2016, bou di enkargo di e Ministerio di BZK, RvIG a kumpra aparatonan nobo pa pedido i produkshon di karchi di identidat. Ku e suministradó aktual a sera un konvenio pa maneho, mantenshon i sosten di e sistema pa emishon di e tarheta di identidat BES. Algun parti di e aparatonan di e sistema di emishon aktual a yega fin di nan durabilidad. Ademas, e kontrakt ku e suministradó aktual ta ekspirá na desèmber 2022.

Meta di e konsulta di merkado ta pa haña un bista di posibel suministradó pa ehekushon di tur e trabounan nesario pa suministro di e sistema kla pa usa, i pa konservashon, inkluso mantenshon, maneho i sosten, di e sistema pa emishon di e tarheta di identidat BES. Ku e konsulta di merkado aki, tambe nos ke haña un bon bista di e grado di interes i e posibilitatnan i imposibilitatnan riba merkado i den dunamentu di servisio. Asina nos ta bini na un balorashon di faktibilidat i kondishonnan esensial pa un posibel enkargo.

Bo ta interesá den e konsulta di merkado aki, i bo ke kontestá algun pregunta di RvIG? Registrá pa **mas tardá 14 di òktober 2022** via febe.smid@rijksoverheid.nl. E ora ei, riba e fecha aki lo bo risibí e dokumentonan di konsulta di merkado.

Aksidente entre outo i skuter

KRALENDIJK -- Alrededor di mitar di seis di atardi djáron 5 di òktober, un aksidente entre un outo i un skuter a tuma lugá riba

Kaya Nikiboko Sùit. E outo a wanta brek diripente dor di kua shofùr di e skuter ku tabata koriendo tras di di e outo tambe mester a wanta

brek i a bin kai. Personal di ambulans a trata shofùr di e skuter na e sitio mes i e no mester a bai hospital pa tratamentu médiko.

Kiebro den akomodashon turístiko

KRALENDIJK -- Djáron 5 òktober a drenta keho di kiebro den un akomodashon turístiko situá na Kaya Playa Lechi. Entre kuartu pa sinku di atardi i kuartu pasá di

anochi, deskonosinan a drenta e akomodashon i a bai ku entre otro dos kòmputa di sambuyá, un Apple Ipad, un tablet Samsung i un Gopro.

Pa oumentá éksito di estudio di studiante Karibense

Pakete ambisioso di medida

KRALENDIJK -- Durante e konferensia di trabou 'Éksito di estudio di studiante Karibense', ku a tuma lugá siman pasá na universidat di Aruba, a bini ku un pakete ambisioso di medida konkreto i struktural pa oumentá éksito di estudio di e studiante Karibense. Ta presentá e resultadonan di e konferensia bou di e nòmber nobo 'Aliansa Stratégiko pa Edukashon', SEA, na e siguiente konsulta ministerial di kuater pais

tokante edukashon, kultura i siensia.

SEA ta formá pa representante di pais Aruba, Hulanda Karibense, Boneiru, Saba, Sint Eustatius, Kòrsou, Sint Maarten i Hulanda i e partidonan di edukashon di e paisnan akí. Nan tin un aña i mei ta traha kaba pa mehorá éksito di estudio di e studiantenan Karibense.

Un gran parti di e studiantenan akí no ta kompletá nan estudio den eksterior. A organisá e konferensia

di trabou na Aruba pa desaroyá e próksimo pasonan konkreto.

E suptítulo di SEA ta 'A bright future for Caribbean Students', un futuro briante pa e studiantenan di Karibe. Pa hasi e futuro akí posibel, un plan stratégiko konhunto ta nesesario, ku ta fortalese e infrastruktura edukativo pa edukashon mas haltu i sekundario den Karibe.

Ademas, un programa di mobilitat konhunto mester hasi mobilitat den Reino

na nivel MBO, HBO i WO posibel i SEA ke prepará e studiantenan na e islanan mihó pa nan eskoho di estudio. E parti último SEA ke hasi dor di ofresé un aña pre-akadémiko, pero tambe dor di uso di medio moderno, manera app i brel di VR. Tur e rekomendashonan akí por topa bek den www.strategiceducationalliance.org.

Segun SEA, un aserkamentu struktural i mehorashon di éksito di es-

tudio di e studiantenan Karibense ta rekerí un kompromiso i partisipashon di tur partido, ku lo dura algun aña. Ta p'esei SEA lo pidi na konsulta di kuater pais pa diskutí i ratifiká e kompromiso multianual akí i eksistencia di SEA.

Tambe SEA lo pidi e ministernan involukrá di edukashon, kultura i siensia, pa pèrkurá pa apoyo finansiero i rekursu i pa garantisá ku ta realisá e akuerdonan hasí.



KÒRSOU

Ministerio GMN i hurídiko ku seshon di informashon riba kalidat di airu

WILLEMSTAD – Resientemente e grupo di trabou ku ta konsistí di kolaboradónan di Ministerio di GMN i di Departamentu Hurídiko (WJZ) a tene un seshon di informashon relashoná ku lei ku ta REGARDÁ kalidat di airu. Esaki tabata spesial pa kompanianan, organisashonnan sosial i servisio di gobièrnu. Di GMN ta forma parti di

e grupo di trabou Ciaretta Profas i Julio Abraham kual ámbos ta di departamentu di Maneho i Yair Stokkermans konsehero di kalidat di airu i di Departamentu Hurídiko Eva Hendricks ku tin eksperiensia amplio ku tópikonan similar.

Intenshon di e seshon ta pa duna informashon relashoná ku e lei ku ta den formulashon i duna oportu-

tunadat na stakeholders pa duna sugerensia kual ta importante pa kalidat di e lei i su faktibilidat. Anteriormente dia 30 di sèptèmber a manda un konsepto pa tur e organisashonnan ku tabata tei presente. Durante e presentashonnan ku a tuma lugá señora Hendricks a duna informashon amplio di e proseso pa yega na e lei. Señor Stokkermans a

duna informashon detayá tokante kalidat di airu relata na supstansia i efekto riba hende.

E konsulta ta importante debí e ta trese partisipashon, transparensia i plataforma di sosten den e proseso di kambio di lei pa yega na e lei nobo di kalidat di airu. Ku atenshon pa e parti di ehekushon kaminda a tene kuenta ku e

parti di leges i kontròl. Dia 4 di òktober a tene un seshon di informashon kaminda stakeholders por a duna sugerensia riba e konsepto di lei.

Den e último siman di òktober lo tene un seshon kaminda ta duna feedback riba sugerensianan di stakeholders.

Pronto lo sigui mas seshon di informashon.

Rekonosementu baluartenan di Wishi i besindario

WILLEMSTAD—Resientemente Minister di Desaroyo Ekonomiko sr Ruisandro Cijntje a duna rekonosementu na baluartenan di Wishi, Marchena i bisindario.

Organisá pa Orguyonan di Colebra Bèrdè a duna rekonosementu na e hòmbèrnan aki ku a traha duru pa formashon di hubentut den e barionan menshoná.

Riba foto entrega di plakat na e baluartenan.



ARUBA

Atraco ariba cas conoci den Tarabana

ORANJESTAD -- Di asabra marduga varios unidad di polis a bay Macubaristraat, unda cu na un adres conoci pa nan un atraco a tuma luga.

Den careda di 2'or di marduga un miembro di famia a yega y ta bin topa cu su famianan mara.

Aki ta unda cu mesora lo a bati alarma.

Na e sitio nos a compronde cu lo ta trata di un posibel atraco.

Dos hende homber a drenta e cas, un halto y un poco mas cortico.

Nan tawata tin ski mask bisti y segun nos a compronde nan tawata arma.

No ta conoci kico tur nan a bay cu ne of kico nan a bin haci e momento ey. Mucho detayes no tin di e duo aki y ni con nan a yega e cas.

Atraco team a wordo poni na altura y lo tin e caso bou investigacion.



Accidente na Brazil a laga dos persona herida atras

ORANJESTAD -- Di asabra anochi den careda di 11'or polis a haya in-

formacion di un accidente cu herido dilanti e establecimiento yama Dream


House. Na yegada polis a topa cu dos vehiculo cu hopi daño material.

Tawata trata di un Chevrolet SUV color preto y un Honda Fit color shinishi. Den e Chevrolet SUV tawata tin dos menor di edad. E accidente a sosode momento cu e dama manehando e Honda Fit a

sali for di e parkeerplaats sin mira cu e Chevrolet SUV tawata acercando.

Chauffeur di e SUV tampoco por a haci mucho y a dal por bisa frontal contra e Honda. Ambulance a wordo pidi y na nan yegada e Paramediconan a controla e muchanan y a resulta cu nan ta ok. Dos

persona a bay Hospital den dos diferente ambulance cu a presenta na e sitio. Polis di trafico cu a presenta na e sitio a tuma tur dato y a pidi pa dos takelwagen na e sitio, mirando cu ningun di e dos autonan lo por move ariba nan mes. Daño material ta grandi.



Tera ariba caminda posibel causa di accidente na Sabana Liber

ORANJESTAD -- Dia-domingo atardi den careda di 5'or un Hyundai Creta color blanco a perde control den e bocht na Sabana Liber. Den e Hyundai tawata tin dos persona un adulto y menor di edad.

Locual a sosode ta cu e dama na stuur di e Hyundai a perde control momento

cu e lo a topa tera ariba caminda, causando cu e la baha caminda bay dal un Toyota Vitz saliendo for di cura. E impacto uno basta duro mirando e daño cu e la causa na tanto na e vehiculo y cura di e cas. Ambulance a presenta pa atende cu esnan di e Hyundai cu a resulta levemente herida.



Maltrato di un persona na un night club

ORANJESTAD -- Di asabra marduga den careda di 12:30 na un night club situa den Weststraat un persona a wordo herida na su cabes. E problema lo a start momento cu security lo a bay of a saca un persona for di e establecimiento.

Aparentemente e persona aki lo no a gusta y a dal e security cu un obheto den su cabes, cortando e seriamente. Durante cu polisnan tawata yegando e sitio nan a mira un auto sali cu velocidad halto y mesora nan a sigui esaki, unda

cu a start un persecucion cortico. Tawata trata di un Toyota Vitz color cora cu a drenta Visstraat bay ariba den verboden.

Saliendo na altura di Kowloon e ta dal contra auto di polis y ta stop. Eynan polis ta detene tres

ocupante, dos homber y un muhe. Tur a wordo hiba warda di polis na Playa.

Departamento di trafico mester a presenta na sitio unda cu despues a laga takel e auto y hib'e Santa Cruz. Ambulance a presenta na e night club unda



cu mester a transporta e persona herida pa Hospital.

ARUBA

Cas Ecury como e 'KLM Huisje' 103 ta:

Muestra di relacion estrecho y fructifero entre KLM y Aruba

ORANJESTAD - Dia-bierna a tuma luga un momento sumamente special pa Aruba. Den cuadro di celebracion di 103 aniversario di KLM, Aruba su Cas Ecury a wordo selecta pa traha un 'KLM huisje' di dje. Esaki sigur ta muestra di e relacion estrecho y fructifero cu ta existi entre KLM y Aruba. Prome Minister Evelyn Wever-Croes na e ocasion a felicita Sra. Marjan Rintel cu a wordo apunta como e CEO di mas

nobo di KLM.

Cada aña cu KLM cumpli un aña mas di aniversario, ta conoci cu nan ta introduci un Delft Blauw 'KLM huisje'.

E aña aki Aruba su monumento 'Cas Ecury' tin e privilegio di a wordo scogi pa wordo traha den version miniatura.

'Segun cu nos ta sigui recupera di e crisis di Covid, nos ta orguyoso di e cifranan di e mercado turistico global y di e mercado Europeo.

Cifranan di Hulanda particularmente ta na nivel mas halto compara cu na 2019. Esaki simplemente no lo por tabata posibel sin e sosten continuo y trahando den cooperacion cu KLM. A traves di e partnership cu KLM a construi hunto e mercado Europeo, cu averahe anual di 4% desde periodo di 2011te

2021,' Prome Minister Werver-Croes a splica.

Aruba ta mantene e vision pa atrae bishitantenan di balor halto, y tambe pa recupera bishitantenan cu ya a bishita Aruba.

Pero tambe pa ricibi bishitantenan nobo cu ta scoge Aruba pa disfruta di un isla sigur, beachnan di calidad halto, hospitalidad, hendenan amabel, atraccionnan, restaurantnan, maraviyanan natural y sigur servico di nivel halto.

Mientras cu no ta facil pa sigura cu e calidad di experiencia cu ta duna na bishitantenan ta keda halto, Aruba ta sigui comprometi na progresa cada dia, door di stimula desaroyo sostenibel pa henter e isla. Esaki ta un compromiso cu ta comparti cu KLM.

Considerando esaki e ta un gran momento pa reconoce y alabes ta orguyoso

di dje, cu un cas y un famia cu tabata instrumental den Aruba su turismo y desaroyo di aviacion, a wordo scogi pa e di 103 aniversario di KLM, Prome Minister a expresa.

Prome Minister Wever-Croes a sigui bisa cu como mama y den nomber di mayornan na Aruba, ta gradici KLM pa conecta mayornan cu nan yiunan cu ta studia na Hulanda.

"E momento historico aki ta importante pa recorda nos di e balor di e relacion cu KLM y con hopi KLM ta significa pa nos dushi isla y asina relexiona riba con por mantene e relacion aki pa hopi aña mas."

Por ultimo, den nomber di Gobierno di Aruba, Prome Minister hunto cu demas coleganan Minister, ta felicita henter team di KLM y deseanan hopi aña di bon cooperacion.



Mas tèst positivo i mas morto dor di Corona

HULANDA – E kantidat di kontagio di Corona sti-pulá, ta krese rápidamente i desde algun dia e notifikashon di kasonan di morto tambe ta krese lihé.

E último siman RIVM a registrá 22.109 tèst positivo, por medio 3158 pa dia. Esaki ta e nivel di mas haltu desde promé di ougùstùs.

Kompará ku e siman an-

terior, e kantidat di kontagio konfirmá a oumentá ku 43,6 porshento.

Entre djárasan mainta i djaweps mainta, 4060 kaso di Corona a bini aserka, e

kantidat mas grandi den un dia desde 27 di yùli.

E sifranan ta basá riba e tèstnan di Corona ku a hasi i e kayanan di tèst di e departamentonan di salubridat públiko. No ta konta tèst propio na kas. Pero tambe for di otro informashon, manera e radar di infekshon, ta bini dilanti ku e kantidat di kontagio di Corona realmente a subi.

E ola di fin di aña a kuminsá, RIVM ta konkluí.

E siman ku a pasa RIVM a haña 42 notifikashon di hende ku a muri a konsekuensia di kontagio di Corona.

Esaki ta e kantidat di mas grandi desde 27 di

aprel, kasi sinku luna pasá.

Djárasan i djabièrnè RIVM a notifiká 11 kaso di morto.

Den un siman di tempu e sifra di morto a bira tri-pel, siman pasá djabièrnè RIVM a notifiká 12 morto dor di Corona den un siman di tempu.

E sifra di reprodukshon ku ta indiká kon lihé e vírus di Corona ta plama su mes, tambe a subi.

Awor e ta pará riba e nivel di mas haltu desde medio yùni, 1,28. Esaki ta nifiká ku un grupo di por medio shen pashènt di Corona a kontagiá otronan, a tras pasá e vírus na mas òf ménos 164 otro.



Amigu muhé haña morto detené

HULANDA – E hòmbèr di 53 aña di edat ku Polis a detené djárasan pa embolbimentu di morto di un muhé ku a haña morto den su kas na Amsterdam, ta

amigu di e víktima. Esaki un bosero di polis a konfirmá den un informe di Het Parool.

Polis tin fuerte sospecho ku ta trata ta e kurpa di Jane

Johnsen di 65 aña di edat. Investigashon mester demostrá esaki definitivamente, pero e ta hopi posibel, segun e bosero di polis.

E amigu durante de-

saparishon di Johnsen a keda den su kas i a detené djárasan. Un dia despues a haña e kurpa sin bida bou di sirkunstansianan sospechoso. Anteriormente

riba djaweps polis a bati alarma pasobra desde 10 di sèptèmber a mira Johnsen pa último biá, kende posiblemente a bira víktima di un krímen.

Kasi mil hende ku Corona den hospital

HULANDA – Hospitalnan ketu bai ta haña nan mas drùk ku kuido di hende ku e vírus di Corona. Aktualmente tin 962 hende ku Corona interná. Esaki ta e kantidat di mas haltu desde 28 di yùli. E último simannan e kantidat a subi ku 266 hende. E sifranan di Landelijk Coördinatiecentrum Patiënten Spreiding (LCPS), no ta hasi distinsjon entre hende ku debí na keho di Corona ta hospitalisá i hende ku tabatin otro keho di malesa i pa kasualidat tambe parse di ta kontagiá.

Rijksinstituut voor Volksgezondheid en Milieu

(RIVM) sí ta vigilá e distinsjon i ta mira ku realmente tin mas hospitalisashon dor di Corona. E instituto ta bisa ku e ola di fin di aña a kuminsá.

Komo ku e kantidat di tèst positivo a subi, prinsipalmente bou di grandinan, ketu bai mas hende ta resultá den hospital debí na Corona. E dia anterior a interná 153 hende nobo, e fluho di mas grandi desde 26 di yùli.

Di e 153 kaso, 11 ta den kuido intensivo, e kantidat di mas haltu desde 22 di yùli. Fin di sèptèmber tabatin ménos ku shen kaso nobo den un dia di tempu.



STATIA/SABA/ST. MAARTEN

Debí na kaso di kólera

Alerta biaha pa Haiti

ST. MAARTEN – E servisio di kolekshon preventivo, CPS, un departamento di Ministerio di Salubridat Públiko, Desaroyo Sosial i Labor, VSA, a tuma nota di un alerta epidemiólogo di e organisashon panamerikano di salú, PAHO, pa loko ta trata kaso di kólera na Haiti.

Debí na e echo ku kólera no ta endémiko na St. Maarten, CPS ke urgi biaheronan ku ta biaha pa paisnan endémiko pa kólera pa

semper tuma e medidanan di prekoushon, manera bebe i usa awa seif, laba man ku habon i awa seif i kome kuminda adekuadamente.

Pa hopi tempu no a reportá kaso di kólera na Haiti, ounke ku dia 2 di òktober outoridatnan nashonal di Haiti a reportá dos kaso konfirmá den e área di Port-au-Prince. Adishonalmente e sospecho di e klùster di e kasonan ta bou di investigashon.

Proyekto Lodi yegando final

STATIA – Ta konstruyendo sinku kas adishonal i sinku kas di emergensia pa aliviá e skarsedat di kas na St.

Eustatius i proveé famianan ku kas temporario.

E kasnan adishonal ta konstruí pegá ku e sinku kasnan eksistente na Felicia

Viola van Zanten Complex na Lodi.

Ta kalkulá ku pa fin di e luna akí ta kompletá e proyekto.



Gobernador ta tuma despedida

ST. MAARTEN – Djamaris su ekselensia gobernador drs. Eugene Holiday

a tuma despedida di Konseho di Minister den su último reunion.

Puntonan di diskushon a konsistí di refleho kaminda e gobernador a proveé un bista di su 12 aña den e posishon i su rekomendashonnan i un kantidat di punto di kosnan ku Konseho di Minister mester sigui atendé.

Despues kada minister a duna un presentashon.

E último punto di agènda tabata rekobrá e relashon di trabou entre e gobernador i Konseho di Minister.

Despues di e reunion, a invitá siudadanonan pa

tuma despedida di Holiday.

E gobernador a keda sorprendé momentu ku el

a sali for di sala di Konseho di Minister i a risibí aplousu.



STATIA/SABA/ST. MAARTEN

Treinen peso i midí a finalisá

SABA – Kuater emplea-
do di Entidat Públiko Saba
e siman akí a partisipá na

un treinen di peso di midí
fasilitá dor di Henk Bartel
di e agensia di telekomu-

nikashon hulandes, Agent-
schap Telecom.

E treinen tabata kom-
biná ku teoria i seshonnan
práktiko, kaminda e partisi-
pantenan tabatin oportuni-
dat pa bishitá un kantidat di
lokalidat na Saba ku ta usa
balansa i stashon di gasolin.

Komo parti di e treinen,
e kuater partisipantenan,
Jerome Matthew, Philbert
Ryner, Jonas Charles i Roe-
lof Matthew, huntu ku Bar-
tel i konseho di asuntunan
ekonómiko di Entidat Pú-
bliko Saba, Courtney Has-
sell, a bishitá un kantidat di

establesimentu pa kontrolá
balansa i ekiponan di peso.

Ku kuater inspektor
kompletando e treinen i
despues di nan nombra-
mentu formal dor di gobièr-
nu, e ophetivo ta pa hasi in-
spekshon regular di balansa
i ekiponan di midi na Saba.


DEPORTE

Ton Nuijten i Bobbi-Lynn de Jong ganadónan overall windsurf

KRALENDIJK--Kom-
petensianan di botonan den
Regata55 tabata un gran
éksito e aña aki den e dife-
rente kategorianan. Ton
(opa) Nuijten (Sunfish)
a resultá overall winner,
miéntas ku Bobbi-Lynn de
Jong (windsurf junior girls
and foil) a resultá over-
all winner den kategoria
youth. Nos ta duna publi-
sidad na e resultadonan den
kada kategoria.

Windsurf KidsGirls.

1. Robin Nicolai Boneiru.
 2. Lovessa Soechit Boneiru.
 3. Eline van der Wulp Boneiru.
- Windsurf Superkids Girls.
1. Kit de Jong Boneiru.
 2. Lone de Jong Boneiru.

3. Lois Schut Boneiru.
 1. Daan Van der Wulp.
 2. Kobe Cornes Boneiru.
- Windsurf Superkids Boys.
1. Kenny Abrahamsz Boneiru.
 2. Eugendrick Dirksz Boneiru.
 3. Seff Smits Boneiru.
- Windsurf Junior Girls.
1. Bobbi-Lynn De Jong Boneiru.
 2. Molly Muller Boneiru.

Windsurf Junior Boys.

1. Storm Nicolai Boneiru.
 2. Tycho Smits Boneiru.
 3. Kick Schut Boneiru.
- Kategoria Sunfish.
- Sunfish B na Sorobon.

1. Sjef Van Burden Boneiru.
 2. Petrie Spijkers Boneiru.
 3. Win Stolk Boneiru.
- Sunfish A Sorobon.
1. Tòn "Opa" Nuijten Boneiru.
 2. Jorge "Kabes" Soliano Boneiru.
 3. Alescander Tromp Boneiru.
- Micro Boats D (30).
1. No Game (Everardo Janga) Boneiru.
 2. Sea Bird (Melissa Domacassé) Boneiru.
 3. Plan B (Raji Lamper) Aruba.
- Micro Boats (C 35).
1. Xtreme (Everardo Janga) Boneiru.
 2. Melissa (Melissa Domacassé) Boneiru.
 3. FX Sports Aruba (Raji Lamper) Aruba.
- Micro Boats (B 40).

1. Khimani (Everardo Janga) Boneiru.
 2. Stay Humble (Raji Lamper) Aruba.
 3. Ta Mi So Melissa Domacassé Boneiru.
- Micro Boats (A 45).
1. Vrolijk (Raji Lamper) Aruba.
 2. The Doctor (Everardo Janga) Boneiru.
 3. Rainbow (Melissa Domacassé) Boneiru.
- Optimist C.
1. Maurits Schothorst Boneiru.
 2. Emmeline Schothorst Boneiru.

Windsurf Foil Junior.

1. Tycho Smits Boneiru.
2. Nicolai Storm Boneiru.
3. Bobbi Lyn De Jongh Boneiru.

Windsurf foil Men.

1. Nigel Hart Boneiru.

2. Carlos Leonard Boneiru.
- Sunfishes B Kralendijk.
1. Win Stolk Boneiru.
 2. Sjef Van Burden Boneiru.
 3. Petrie Spijkers Boneiru.
- Sunfishes A Kralendijk.
1. Ton "Opa" Nuijten Boneiru.
 2. Kaydian Dowling Boneiru.
 3. Jorge "Kabes" Soliano.
- Kategoria Yachts Multi-hull.
1. Paraiso ku kapitan Gerrie Fokke.
 2. Flower Power ku kapitan Lelle Davidson.
- Yachts.
1. Jenk ku kapitan Jan Hendrik van der Wier.
 2. Papyro ku kapitan Enrique Gasco. Pabien na e ganadoran.

DEPORTE

SV Vitesse a gana SV Vespo 1-0 den plei-òf di kuater

KRALENDIJK--E ekipo di futbòl di Antriòl Pabou ku ta SV Vitesse, djadumingu último den partido bálido pa plei-òf di kuater kampionato 2022

d futbòl di nos isla, a gana di SV Vespo di Rincon ku skor mínimo di 1-0 i logra su promé viktoria di e plei-òf.

E partido aki a tuma lugá

den Stadion Antonio Trenidad na Rincon den presensia di un bon públiko.

Un total di 715 fanátiko a paga pa mira e partido aki, loke ta bon pa 501

adulto, 128 mucha i 86 fanátiko riba 60 aña.

E partido aki no a kono- sé gol den su promé mitar.

Tabata e di dos mitar di e partido ku SV Vitesse na di 85 minüt di e partido ta haña un tiru liber, ku Guillermo Montero ku tremendo tiru ta hinka e úniko gol di e partido, loke a resultá sufisiente pa SV Vitesse bai ku e 3 puntonan i e vik-

toria di e partido.

Un danki na e fanatikada ku a presensia e partido, esaki danki na FFB i Rincon Boys ku a entrené e fanatikada e anochi aki na final di e partido.

Rèfri ku a dirigí e partido aki ta Juniel Adelina huntu ku su asistentenan na banda. Despues ku e kuater ekiponan a hunga nan promé partido di e buelta di kuater, Real Rincon ta na kabes ku 3 punto for di 1 partido ganá 0 pèrdí, 2 gol na fabor 1 kontra, 3 punto.

SV Vitesse 1 partido ganá 0 pèrdí, 1 gol na fabor 0 kontra (+1), 3 punto.

Atl. Flamengo 0 ganá 1 pèrdí, 1 gol na fabor 2 kontra (-1), 0 punto.

SV Vespo 0 ganá 1 pèrdí, 0 gol na fabor 1 kontra (-1), 0 punto.

Riba potrétnan rèfrinan ku a dirigí e partido, ekiponan i outor di e úniko gol di e partido. Éksito na e kuater ekiponan den e plei-òf.



Djárason Uruguay vs ATC den FFB Cup

KRALENDIJK--Kampionato futbòl 2022 di nos isla ta sigui mañan djárason 12 di òktober 2022 pa 8or anochi den Stadion Antonio Trenidad na Rincon, esaki ku partido bálido pa e torneo Kopa FFB 2022.

Pa mañan ta enfrentá otro e ekiponan SV Uruguay di Antriòl Pariba i SV ATC di Tera Kòrá tratando na logra bai ku Kopa FFB 2022.

E partido aki sin duda lo bira un tremendo partido ku e dos ekiponan buskando e viktoria foi dje partido.

Esaki ta hasi e partido aki unu interesantisimo pa e fanatikada di e dos ekiponan aki i di e deporte rei futbòl pa mira.

Informashon ta muestra ku e ekiponan aki a prepará nan mes bon pa ku e partido aki tratando na logra un viktoria foi dje partido pa yega e final dia 21 di òktober 2022.

Un invitashon ta bai pues na e fanatikada di e dos ekiponan aki i di e deporte rei futbòl, pa presensia e partido apoyando nan ekipo favorito.

Éksito na e ekiponan den e partido.



Den promé partido plei-òf di kuater

SV Real Rincon 2-1 riba Atl. Flamingo djabièrnè último

KRALENDIJK--E kampionnan di SV Real Rincon di Rincon, despues di tabata tras 1-0 den promé partido di plei-òf di kuater kampionato 2022 di futbòl di nos isla djabièrnè último den Stadion Antonio Trenidad na Rincon, a reakshoná i gana Atl. Flamingo di Nikiboko ku skor di 2-1 den presensia di un bon pùliko ku a paga pa mira e partido.

Tabata Atl. Flamingo

na di 18 minüt di e promé mitar di e partido, a bai dilanti 1-0 ku gol di Jermaine Windster.

Djis despues di esaki, na di 21 minüt di e partido, SV Real Rincon ku gol di Fabio Hierck ta empatá e partido 1-1, skor tambe ku e partido a parti na dos kuné pa sosiegu.

Di dos mitar di e partido, e ekiponan buskando e gol di bai dilanti, tabata e kampionnan di SV Real



Rincon na di 76 minüt di e partido, ta bai dilanti 2-1 ku e di dos gol di Fabio Hierck.

Despues di esaki e partido no a konosé mas gol, e partido ta finalisá ku viktoria di 2-1 pa e kampionnan di SV Real Rincon ku a bai ku e 3 puntonan di e partido.

SV Real Rincon ku e viktoria aki ta bai dilanti tambe den e plei-òf ku 1 partido ganá 0 pèrdí i falta dos partido mas di e buelta aki.

Un gran pùliko di 566 fanátiko a paga pa mira e partido, loke ta bon pa 381

hende grandi, 110 mucha i 75 fanátiko riba 75 aña a paga pa mira e partido aki.

Rèfri ku a dirigí e partido aki ta Cassius Coffie huntu ku su asistentenan.

Tabata sigur un tremendo partido.

Riba potètnan por mira e rèfrinan ku a dirigí e partido, e ekiponan i outornan di e golnan di e partido.

Éksito na e ekiponan

den e plei-òf di kuater ku a sigui djadumingu último ku e di dos partido di e plei-òf, esaki momentu ku e ekiponan "V" den e kampionato ku ta SV Vitesse di Antriòl Pabou i SV Vespo di Rincon a enfrentá otro.

Nos lo bini ku e resultado den nos edishon di mañan.

Éksito na e ekiponan den e plei-òf.

Aruba a gana Wolf Pack den final

KRALENDIJK--Un ekipo di beisbòl U6 di pais ruman Aruba ku tabata di bishita riba nos isla, a titulá kampion di un torneo beisbòl U6 organisá pa e ekipo Stars, esaki na Fèlt Dudy Josephia o sea Amas Ballpark siman pasá.

T'asina ku fin di siman pasá e ekipo di Aruba a gana Wolf Pack 14-11 despues di tabata tras den e partido.

Wolf Pack tabata ganá pero den último inen riba algun fayò ta kai vensí kontra Aruba.

Durante e parti semifin di e torneo, Wolf Pack ta bolbe topa ku Aruba i ta gana ku skor di 7-3 i pasa

pa final di e torneo kontra Aruba.

Den e final djasabra último Aruba despues di batayá formal ku Wolf Pack, ta logra gana Wolf Pack ku skor pèrtá di 13-12 den último inen di e partido.

Ku esaki ta keda demostrá ku ekiponan di otro islanan ruman i tambe otro paisnan mas leu, tin di tene debido kuenta ku nos ekiponan di nos futuronan den e deporte di beisbòl ku tin un bunita desaroyo su dilanti.

Nos ta deseá nos futuronan den e deporte di beisbòl di nos isla, tur pero tur klase di éksito den e deporte di beisbòl.



DEPORTE

Djasabra último klousura Regata55

Regata 56 di dos siman òktober di 9 pa 13 òktober 2023

KRALENDIJK -Djasabra último 8 di òktober 2022 pa 7or anochi tabatin klousura Regata55 na ofisina di SKAL na Playa Pabou.

Pa e anochi aki meskos ku tabata e kaso na apèrtura, Sharmanta ta-

bata MC, tambe e diferente diskursonan di entre otro e oranisadónan di Aquaspeed Bonaire Windsurfer, diputado di deporte sr. James Kroon i tambe representante di e “main sponser” ku ta Guardian Group Fatum

ku ta sùmamamente kontentu di por spònsa un evento asina manera Regata di Boneiru.

Nan lo sigui spònsa tambe e regata di nos isla segun a bin dilanti durante diskurso di direktor di e kompaia.

Despues di e diferente diskursonan a sigui e parti di premiashon ku tabata na enkargo di representantenan di e spònsa prinsipal ku ta Guardian Group Fatum i diputado di deporte sr. James Kroon.

Na final di e premiashon a sigui músika di brasbènt i tambe Foyan Boys pa sera e anochi di premiashon.

Pa loko ta e premiashon, manera ta kustumber di e organisadónan, nan a parti atrobe basta premio ku tur hende a keda kontentu kuné.

E organisadónan di Aquaspeed Bonaire ku sra. Liesje Saragoza na kabes huntu ku su man drechi

sra. Derchlin Dijkhof, ta sùmamamente kontentu di por a organisá Regata55. Ta bon pa menshoná ku e anochi di premiashon, sra. Liesje Saragoza, a duna di konosé tambe ku Regata 56 ya tin su fecha.

Esaki lo tuma lugá e di dos siman di òktober 2023, di 9 pa 13 di òktober 2023.

Trabounan ya a kumin-sá pues pa ku Regata56.

Nos ta deseá e organisadónan di Aquaspeed Bonaire tur pero tur klase di éksito.

Riba potrèntan parti di e premiashon di nos hubenilnan ku a tuma lugá djasabra último na Ofisina di SKAL na Playa Pabou.



Miembro di Kanta Orkidia a bishitá Franswa



Meet the **NEW MEMBER** of our
CHANGAN WORKFORCE

MS201 DOUBLE CABIN

\$16,995



2-meter Long Flat Bed



Double Airbag



f /dabboussimotors

8 786.6662